

元史

冊二

元史卷五

明翰林學士亞中大夫知制誥兼修國史宋濂等修

本紀第五

世祖二

三年春正月癸亥修宣聖廟成庚午罷高麗互市諸王播齊爾請置鐵冶從之請立互市不從呼魯古爾所部民饑罷上供羊命銀冶戶七百河南屯田戶百四十賦稅輸之州縣命匠戶爲軍者仍爲軍其軍官當考第富貧存恤無力者耶律鑄詣北京餉諸王軍仍遣宣撫使柴禎等增價糴米三萬石益之賜高麗國曆辛未禁諸道戍兵及勢家縱畜牧犯桑棗禾稼者癸酉以軍興人民勞苦勅停公私逋負毋徵癸未賜廣寧王卓多駝鈕金鍍銀印及諸王哈必齊行軍印宋制置使賈似道以書誘總管張元等李壇獲其書上之丙戌命江漢大都督史權亳州萬戶張弘彥將兵八千赴燕備宮懸鍾磬樂舞簫翟凡用三百六十二人高麗遣使奉表來謝優詔答之李壇質子彥簡逃歸二月丁亥朔元籍

軍竄名爲民者命有司還正之括諸道逃亡軍己丑李璫反以漣海三城獻于宋盡殺蒙古戍軍引麾下趨益都前宣撫副使王磐脫身走至濟南驛召磐令姚樞問計磐對璫子狂妄卽成擒耳帝然之庚寅宋兵攻新蔡辛卯始定中外官俸命大司農姚樞講定條格甲午李璫入益都發府庫犒其將校乙未詔諸道以今歲民賦市馬丙申郭守敬造寶山漏成徙至燕京以興松雲三州隸上都辛丑李璫遣騎寇蒲臺癸卯詔發兵討之以趙璧爲平章政事修深冀南宮棗強四城甲辰發諸蒙古漢軍討李璫命水軍萬戶解成張榮實大名萬戶王文幹及萬戶嚴忠範會東平濟南萬戶張宏歸德萬戶邱浹武衛軍礮手元帥薛軍勝等會濱棣詔濟南路軍民萬戶張宏濱棣路安撫使韓世安各修城塹盡發管內民爲兵以備召張柔及其子弘範率兵二千詣京師丙午命諸王哈必齊總督諸軍以布扎爾額布根及趙璧行中書省事於山東宋子貞參議行中書省事董源高逸民爲左右司郎中許便宜從事真定順天河間平灤大名邢州河南諸路兵皆會濟南以中書左丞庫庫尙書克噶木宣撫游顯行宣慰

司於大名洛磁懷孟彰德衛輝河南東西兩路皆隸焉己酉王文統坐與李壇同謀伏誅仍詔諭中外王演等以妖言誅辛亥勅元帥阿哈分兵戍平灣海口及東京廣寧懿州以餘兵詣京師詔諸道括逃軍還屯田嚴其禁壬子李壇據濟南癸丑詔大名洛磁彰德衛輝懷孟河南真定邢州順天河間平灤諸路皆籍兵守城宋兵攻滕州丙辰詔巴圖摩多將息州戍兵詣濟南移其民於蔡州東平萬戶嚴忠範留兵戍宿州及蘄縣以餘兵自隨三月戊午詔非中書省文移及兵民官申省者毋許入遞己未括穆蘇愛滿輝和爾伊嚕勒昆達實密等戶丁爲兵庚申括北京鷹坊等戶丁爲兵蠲其賦令趙炳將之辛酉準巴圖言河南有自願從軍者卽命將之遣鄭鼎沙木斯鼎達哩岱索多行宣慰司事于平陽太原簽見任民官及捕鷹坊人匠等軍徙弘州錦工繡女于京師勅河東兩路元括金州兵付鄭鼎將之以平章政事瑪穆特廉希憲參政商挺斷事官穆蘇行中書省于陝西四川獲私商南界者四十餘人命釋之勅燕京至濟南置海青驛凡八所壬申命戶部尙書劉肅專職鈔法平章政事賽音樸德齊兼

領之以薩奇蘇柴禎行宣慰司事于北京免今歲絲銀止輸田租癸酉命史樞
阿珠各將兵赴濟南遇李壇軍擊破之斬首四千壇退保濟南乙亥宋將夏貴
攻符離戊寅萬戶韓世安率鎮撫馬興千戶張濟民大破李壇兵於高苑獲其
權府傅珪賜濟民與金符詔以李壇兵敗諭諸路禁民間私藏軍器壬午以輝
和爾字書給驛璽書免西京今年絲銀稅甲申免高麗酒課乙酉宋夏貴攻斬
縣諭諸路管民官毋令軍馬使臣入州城村居鎮市擾及良民夏四月丙戌朔
大軍樹柵鑿塹圍壇于濟南丁亥詔博興高苑等處軍民嘗爲李壇脅從者並
釋其罪庚寅命克呼木安撫張耕分邢州戶隸兩達爾罕辛卯修河中禹廟賜
名建極宮壬辰以大梁府渠州路軍民總帥蒲元圭爲東夔路經略使丙申宋
華路分湯太尉攻徐鄧二州詔分張柔軍千人還戍亳州庚子江漢大都督史
權以趙百戶挈衆逃歸斬之詔自今部曲犯重罪鞫問得實必先奏聞然後寘
諸法詔安輯徐鄧民禁征戍軍士及勢官毋縱畜牧傷其禾稼桑棗以米千石
牛三百給西京蒙古戶癸卯宋兵攻亳州甲辰命行中書省宣慰司諸路達魯

噶齊管民官勸誘百姓開墾田土種植桑棗不得擅興不急之役妨奪農時乙巳以北京廣寧豪懿州軍興勞弊免今歲稅賦命諸路詳讞冤獄詔河東兩路并平陽太原路達嚕噶齊及兵民官撫安軍民各安生業毋失歲計丁未李壇遣柴牛兒招諭部民盧廣縛以獻殺之以廣權威州軍判兼捕盜官戊申賜諸王額森克金印庚戌賜諸王哈必齊金銀海青符各二免松山興州望雲縣新舊差賦以望雲松山興州課程隸開平府壬子勅非軍情毋行望雲驛乙卯河南路王豁子張無僧杜信等謀爲不軌並伏誅詔右丞相史天澤專征諸將皆受節度五月戊午蘄縣陷權萬戶李義千戶張好古死之庚申築環城圍濟南壇不復得出詔薩奇蘇安撫益都路百姓各務農功仍禁蒙古漢軍剽掠癸亥史權妄奏徐邳總管李誥格完復邳州城詔由誥格以下並原其罪時宋將夏貴攻邳州誥格出降貴旣去誥格自陳能保全州城史權以聞故有是命甲子宋兵攻利津縣燭濱棣今歲田租之半東平蠲十之三自燕至開平立牛驛給鈔市車牛戊辰以左丞相和爾布哈兼中書省都斷事官賜虎符真定順天

邢州蝗以平章政事賽音諤德齊兼領工部及諸路工作以孟烈所獻蹶張弩藏于中都丙子晉山至望雲立海青驛丁丑李誥格等伏誅命史天澤選考徐邳總管甲申真定路巴雅爾哈雅殺造僞鈔者三人讓其違制之罪西京宣德咸寧龍門霜天順平陽河南真定兩雹東平濱棣旱詔覈實逃戶輸納絲銀稅租戶口增者賞之隱匿者罪之逃民苟免差稅重加之罪大司農姚樞辭赴省議事帝勉留之命樞與左三部尙書劉肅依前商議中書省事六月乙酉朔宋兵攻滄州雅州瀘山民既降復叛命誅其首亂者七人餘令安業割遼河以東隸開元路戊子濱棣安撫使韓世安敗宋兵于濱州丁河口己丑遣塔齊爾帥兵擊宋軍仍安諭瀕海軍民乙未禁女直侵軼高麗國民其使臣往還官爲護送命博索府屯田軍移駐鴨綠江之西以防海道丙申高麗國王王禕遣使來貢壬寅陝西行省言西京宣德太原匠軍困乏乞以民代之有旨軍籍已定不宜動搖宜令貧富相資果甚貧者令休息一歲癸卯太原總管李穀努克達嚕噶齊戴齊蘇等領李壇僞檄傳行旁郡事覺誅之勅武寧軍歲輸所產鐵河西

民及諸王和斯濟勒所部軍乏食給鈔賑之壬子申嚴軍官及兵伍擾民之禁
癸丑立小峪蘆子寧武軍赤泥泉鐵冶四所東平嚴忠濟向爲民貸錢輸賦四
十三萬七千四百定借用課程鈔本鹽課銀萬五千餘兩詔勿徵秋七月戊午
復蒙古軍站戶差賦農民包銀徵其半俘戶止令輸絲民當輸賦之月毋徵私
債勅私市金銀應支錢物止以鈔爲准丙寅賜夔州路行書楊大淵金符土銀
符十九賞麾下將士別給海青符二事有急速馳以上聞立槍杆嶺驛以便轉
輸癸酉甘州饑給銀以賑之甲戌李壇窮蹙投大明湖水中不卽死獲之併蒙
古軍囊嘉特伏誅體解以徇戊寅以夔府行省劉整行中書省於成都潼川兩
路仍賜銀萬兩分給軍士之失業者八月己丑郭守敬請開玉泉水以通漕運
廣濟河渠司王允中請開邢洛等處漳滏澧河達泉以溉民田並從之甲午博
多歡等奏請以宣德州德興府等處銀冶付其匠戶歲取銀及石綠丹粉輸官
從之丙午立諸路醫學教授戊申勅王鶚集廷臣商權史事鶚等乞以先朝事
蹟錄付史館河間平灤廣寧西京宣德北京隕霜害稼九月戊午亳州萬戶張

弘略破宋兵于蘄縣復宿蘄二城以待衛親軍都指揮使董文炳兼山東路經略使收集益都舊軍充武衛軍戍南邊詔益都行省大都督薩奇蘇與董文炳會議兵民籍每十戶惟取其二充武衛軍其海州東海漣水移入益都者亦隸本衛己未罷霸州海青驛安南國陳光昞遣使貢方物壬戌改邢州爲順德府立安撫司洛磁威三州隸焉聽太原民食小鹽歲輸銀七千五百兩己巳以摩和納餉軍有功授禮部尙書賜金符壬申授安南國王陳光昞及達嚕噶齊納喇丹虎符勅濟南官吏凡軍民公私逋負權閣毋徵癸酉都元帥庫庫岱卒于軍以其兄阿珠代之授虎符將南邊蒙古漢軍閏月甲申朔沙肅二州乏食給米鈔賑之丁亥立古北口驛己丑濟南民饑免其賦稅免諸路軍戶他徭庚寅勅京師順州至開平置六驛辛卯嚴忠範奏請補東平路廟學太常樂工從之勅武衛軍及黑軍會于京師庚子中翼千戶玖珠破宋兵于虎腦山庚戌發粟三十萬賑濟南饑民冬十月丙辰放金州所屯軍士二千人及大明河南新簽防城軍爲民庚申分益都軍民爲二董文炳領軍薩奇蘇治民禁諸王使臣師

旅敢有恃勢擾民者所在執以聞詔以李壇所掠民馬還其主以郝經劉人傑使宋未還廩其家中書省奏與宋互市庶止私商及復逋民之留于宋者且覘漣海二州不允以劉人傑不附李壇擢益都路總管仍以金帛賜之壬戌授益都行中書省都督府所統州郡官金符十七銀符十一乙丑詔禁京畿畋獵丙寅分東西兩川都元帥府爲二以托迪及劉整等爲都元帥及左右副都元帥詔責高麗欺慢之罪又詔賜高麗王禋歷以戰功賞渠州達嚕噶齊王章等金五十兩銀一千五百五十兩賞閬蓬等路都元帥合州戰功銀五千兩丁卯詔鳳翔府屯田軍隸兵籍仍屯田鳳翔放刁國器所簽平陽軍九百一十五人爲民閬蓬廣安順慶夔府等路都元帥奇徹戍青居山請益兵詔陝西行省及鞏昌總帥汪惟正以兵益之戊辰楊大淵乞於利州大安軍以鹽易軍糧從之庚午勅鞏昌總帥汪惟正將戍青居軍還屯田利州乙亥分中書左右部丁丑勅宿州百戶王達等所擒宋王用夏珍等八人赴京師命伯嘉努所將質子軍入侍戊寅命布嚕魯所統固安平灣質子軍自益都徙還故地詔益都府路官吏

軍民爲李壇脅從者並赦其罪勅萬戶嚴忠範修復宿州蘄縣萬戶呼圖克輝圖何總管修完邳州城郭十一月乙酉太白犯鉤鈴丁亥勅聖安寺作佛頂金輪會長春宮設金籙周天醮辛丑日有背氣重暈三珥敕濟南人民爲李壇裨校掠取財物者詣都督薩奇蘇所訟之真定民郝興讎殺馬忠忠子榮受興銀令興代其軍役中書省以榮納賂忘讎無人子之道杖之沒其銀事聞詔論如法有司失出之罪俾中書省議之三義沽竈戶經宋兵焚掠免今年租賦汰少府監工匠存其良者千二百戶遣官審理陝西重刑敕河西民徙居應州其不能自贍者百六十戶給牛具及粟麥種仍賜布人二匹乙巳詔都元帥阿珠分兵三千人同額森布哈輝圖兵馬復立宿州蘄縣邳州有旨諭史天澤朕或乘怒欲有所誅殺卿等宜遲留一二日覆奏行之丙午詔特徵人員宜令乘傳戊申陞撫州爲隆興府以實喇諤都爲總管割宣德之懷安天成及威寧高原隸焉十二月甲寅封皇子珍戡爲燕王守中書令丙辰敕諸王塔齊爾等所部獵戶止收包銀其絲稅輸之有司立河南山東統軍司以塔爾琿和爾齊爲河南

路統軍使盧昇副之東距亳州西至均州諸萬戶隸焉察克布哈爲山東路統軍使武秀副之西自宿州東至寧海諸萬戶隸焉罷各路急遞鋪丁已立十路宣慰司以真定路達嚕噶齊趙璫等爲之己未犯罪應死者五十三人詔重加詳讞辛酉詔給懷州新民耕牛二百俾種水田立諸路轉運司以燕京路監權官曹澤等爲之使癸亥享太廟詔各路總管兼萬戶者止理民事軍政勿預其州縣官兼千戶百戶者仍其舊乙丑復立息州城以安其民召真定順德等路宣慰使王磐乘傳赴京師丙寅申嚴屠殺牛馬之禁己巳詔諸路管民總管子弟有分管州府司縣及鷹坊人匠諸色事務者罷之壬申遣使收輯諸路軍民官海青牌及驛券戊寅詔諸路管民官理民事管軍官掌兵戎各有所司不相統攝作佛事於昊天寺七晝夜賜銀萬五千兩割北京興州隸開平府建行宮于隆興路陞太原臨泉縣爲臨州降寧陵爲下縣仍隸歸德賜諸王金銀幣帛如歲例是歲天下戶一百四十七萬六千一百四十六斷死罪六十六人

四年春正月乙酉禁蒙古軍馬擾民宋賈似道遣楊琳齎空名告身及蠟書金

幣誘大獲山楊大淵南歸大淵部將執琳詔誅之以宋和爾穆爾及沙津回回
鷹坊等兵戍商州藍田諸盜軍民官各從統軍司及宣慰司選舉岳天輔乞復
立息州不允丙戌以姚樞爲中書左丞改諸路監權課稅所爲轉運司甲午給
公主巴古符印其所屬設達嚕噶齊給鈔賑益都路貧民之無牛者立十路鄂
囉總管丁酉益都路行省大都督薩奇蘇上李壇所傷漣水軍民及陷宋蒙古
女直特默齊軍數男女凡七千九百二十二人癸卯領部阿哈瑪特請與河南
等處鐵冶設東平等路巡禁私鹽軍從之召商挺趙良弼赴闕乙巳敕李平陽
以所部西川出征軍士戍青居山其各翼軍在青居山者悉還成都詔陝西行
省塔喇海等收恤離散軍戶詔以諸路漢軍諤囉丹隸各萬戶管領其科徵差
稅山東河南隸統軍司東西兩川隸征東元帥府陝西隸行戶部凡鄂囉官內
有各萬戶弟男及私人皆罷之敕總帥汪忠臣都元帥托迪及劉整等益兵付
都元帥奇徹戍青居山仍以解州鹽課給軍糧丙午詔諸翼萬戶簡精兵四千
充武衛軍罷古北口新置驛增萬戶府監戰一員參議一員以瑪哈穆特所俘

濟南老僧口之民文面爲奴者付元籍爲民汪忠臣史權械宋諜者六人至京師有旨釋之辛亥申禁民家兵器及蒙古軍擾民者陵州達嚕噶齊莽格戰死濟南以其子孟古岱襲職召雲頂山侍郎張威赴闕二月壬子朔命河東宣慰司市馬百二十九匹賜諸王巴喇軍士之無馬者甲寅詔諸路官員子弟入質以高麗不答詔書詰其使者以民杜了翁先朝舊功復其家庚申賞萬戶齊喇所部將士討李壇有功者銀二千七百五十兩甲子車駕幸開平以王德素充國信使劉公諒副之使于宋致書宋主詰其稽留郝經之故詔諸路置局造軍器私造者處死民間所有不輸官者與私造同三月戊子沂州胡節使范同知陷于宋命存恤其家或言其嘗爲宋兵嚮導乃分其妻孥資產賜有功將士辛卯敕薩奇蘇招集益都逃民命董文炳以所獲宋諜及俘八十一人赴隆興府聽諸路獵戶及捕盜巡鹽者執弓矢壬辰遣扎瑪里鼎和糴東京己亥諸路包銀以鈔輸納其絲料入本色非產絲之地亦聽以鈔輸入凡當差戶包銀鈔四兩每十戶輸絲十四斤漏籍老幼鈔三兩絲一斤庚子伊克德岱請修瓊華

島不從壬寅關東蒙古漢軍官未經訓敕者令各乘傳赴開平癸卯初建太廟
乙巳賜德沁諾延等銀七千九十兩命北京元帥阿哈發漢軍二千人赴開平
己酉高麗國王王禕遣其臣朱英亮入貢上表謝恩復立宿州夏四月庚戌朔
以漏籍戶一萬一千八百附籍戶四千三百於各處起治歲課鐵四百八十萬
七千斤癸丑選益都兵千人充武衛軍甲寅償河西阿實克賑所部貧民銀三
千七百兩己未以完顏端田宅賜益都千戶傳國忠國忠父天祐爲端所殺故
命以其田宅賜之宣德至開平置驛罷開元路宣慰司丙寅西京武州隕霜殺
稼戊寅召竇默許衡乘驛赴開平諸王阿濟格所部貧民遠徙者賜以馬牛車
幣以東平爲軍行蹂踐賑給之改滄清深鹽提領所爲轉運司王鶚請延訪太
祖事蹟付史館五月癸未詔北京運米五千石赴開平其車牛之費並從官給
乙酉初立樞密院以皇子燕王守中書令兼判樞密院事戊子陞開平府爲上
都其達嚕噶齊烏勒希爲上都路達嚕噶齊總管董銓爲上都路總管兼開平
府尹辛卯詔立燕京平準庫以均平物價通利鈔法乙未敕商州民就戍本州

毋禁弓矢丙申立上都馬步驛丁酉以元帥楊大淵張大悅復神山有功降詔
獎諭戊戌詔以禮部尙書摩和納兼領潁州光化互市及領已括戶三千興煥
鐵冶歲輸鐵一百三萬七千斤就鑄農器二十萬事易粟四萬石輸官河南隨
處城邑市鐵之家令仍舊鼓鑄庚子河南路總管劉克興矯制括戶罷其職籍
家資之半陞上都路望雲縣爲雲州松山縣爲松州賞前討瑄塔噶戰功薩里
圖庫庫楚等鈔二千一百七十四錠幣帛一千四百二十匹六月壬子河間益
都燕京真定東平諸路蝗乙卯以管民官兼統懷孟等軍阿薩爾戰歿汴梁授
其子孟古岱萬戶佩金符戊午賜錫津田戶六百己未賜高麗國王王植羊五
百癸酉賜巴古公主所部鈔千錠立上都惠民藥局建帝堯廟於平陽仍賜田
十五頃以錫津爲中書右丞相塔齊爾爲中書左丞相秋七月癸未詔諸投下
毋擅勾攝燕京路州縣官吏乙酉禁野狐嶺行營民毋入南北口縱畜牧損踐
桑稼給公主巴古銀五萬兩哈喇哈納銀千兩乙未以故東平權萬戶呂義死
王事賜諡貞節戊戌詔弛河南沿邊軍器之禁陞燕京屬縣安次爲東安州固

安爲固安州河南統軍司言屯田民爲保甲丁壯射生軍凡三千四百人分戍沿邊州郡乞蠲他徭從之庚子詔賜諸王卓多牛馬價銀六萬三千一百兩壬寅詔禁益都路特默齊擾民以成都經略司隸西川行院禁蒙古漢軍諸人煎販私鹽詔山東經略司徙膠萊莒密之民及竈戶居內地中書省臣以妨煮鹽爲言遂令統軍司完復邊戍居民竈戶毋徙詔阿珠戒蒙古軍不得以民田爲牧地燕京河間開平隆興四路屬縣雨雹害稼八月戊申朔詔和木哈總管諸路驛佩金符辛亥置元帥府于大理詔東平大名河南宣慰司市馬千五百五十匹給阿珠等軍陞宣德州爲宣德府隸上都以淄萊登三州爲總管府治淄州命錫勒希總制鬼國大理兩路兵部郎中劉芳前使大理至吐蕃遇害命恤其家壬子命中書省給北京西京轉運司車牛價鈔彰德路及洛磁二州旱免彰德今歲田租之半洛磁十之六冀州蒙古百戶阿實克等犯鹽禁沒入馬百二十餘匹以給軍士無馬者甲寅命成都路運米萬石餉潼川給鈔付劉整市牛屯田分劉元禮等軍戍潼川命阿敦將之丙辰詔以成都路綿州隸潼川戊